



Réponse commune du Ministre du Travail et du Ministre de l'Économie, des PME, de l'Énergie et du Tourisme à la question parlementaire N°3447 du 13 janvier 2026 de l'honorable Députée Liz BRAZ concernant « Mesures de sécurité dans les bars et discothèques ».

Fro N°1: Wéi vill Diskoen a Baren sinn aktuell offiziell zu Lëtzebuerg enregistréiert an zougelooss?

Mat der Reform vum Droit d'établissement gouf 2023 d'Aktivitéit « Exploitant d'une discothèque » nei agefouert, allerdéngs sinn an dëser Kategorie just déi Diskoen opgelëscht, déi no 2023 opgaange sinn (et handelt sech heibäi ëm véier Entreprisë mat insgesamt véier Handelermächtigungen). Et ass deemno aktuell net méiglech alleguerten Diskoen a Baren separat opzelëschten.

Zu Lëtzebuerg sinn aktuell 5.767 Entreprisë mat enger Aktivitéit als « Exploitant d'un débit de boissons et d'un établissement de restauration » enregistréiert a sinn deemno als Disko, Bar an/oder Restaurant aktiv. Well en Etablissement méi Autorisatioun kann hunn, zum Beispill fir e Restaurant a fir eng Disko, hunn dës 5.767 Entreprises insgesamt 6.645 valabel Handelermächtigung fir eng Aktivitéit als « Exploitant d'un débit de boissons et d'un établissement de restauration ».

Des Weidere sief vermierkt, datt ëffentlech Gebaier, déi fir musikalesch-ënnerluechte Festivitéite genotzt ginn (zum Beispill Kulturzentren), net vum Wirtschaftsministère erfaasst ginn, wuel awer ënnert d'Dispositioun vum der Kommodogesetzgebung falen.

Fro N°2: Wéi eng konkret Brandschutz- a Sécherheetsvirschrëfte gëllen zu Lëtzebuerg fir Diskoen?

Am Kader vum Kommodosgesetz gëllen zu Lëtzebuerg fir Diskoe konkret Brandschutz- a Sécherheetsvirschrëften, déi an der jeeweileger Kommodo-Geneemegung festgehale ginn.

Diskoe mat enger Kapazitéit vun 100 bis 500 Persoune falen dobäi an de Kompetenzberäich vum Buergermeeschter. Diskoen, déi eng Kapazitéit vu méi wéi 500 Persoune hunn, falen dogéint an de Kompetenzberäich vum Aarbechtsminister an och vum Ëmweltminister.

Fir Säll, déi an de Kompetenzberäich vum Aarbechtsminister falen, ginn d'Brandschutz- a Sécherheetsvirschrëften an der Reegel a Form vu Standardvirschrëften applizéiert.

D'Brandschutzvirschrëften fir d'Gebai hänken dobäi vun der Héicht vum Gebai of an droen d'Bezeechnungen ITM-SST 1501 « Bâtiments bas », ITM-SST 1502 « Bâtiments moyens » an ITM-SST 1503 « Bâtiments élevés ». Zousätzlech gëlle fir Säll mat vill Publikum déi spezifesch Virschrëften ITM-SST 1507 « Salles recevant du public », déi komplementär zu de genannte Brandschutzvirschrëfte fir d'Gebai sinn.

Am Eenzelfall kënnen och ponktuell Ersatzmoosname festgeluecht ginn, wann domat dee selwechte Sécherheetsniveau erreecht gëtt.

Onofhängeg vum Kommodosgesetz muss all Employeur, deen op mannst ee Salarié beschäftegt an eng Disko exploitéiert, och d'Dispositiounen vum Code du travail an déi jeeweileg Règlements d'exécution respektéieren, besonnesch am Beräich vun der Sécherheet a Gesondheet op der Aarbecht. Hie muss dofir d'Preventioun organiséieren, d'Personal forméieren an déi néideg Moossname fir d'éischt Hëllef, d'Brandbekämpfung an d'Evakuatioun huelen, souwéi déi néideg Kontakter mat externen Nout- a Rettungsdéngschter assuréieren.

Fro N°3: Wéi dacks ginn dës Etablissementer kontrolléiert, a handelt et sech dobäi ëm systematesch a regelméisseg Kontrollen oder ëm punktuell Iwwerprüiwungen?

Dës Etablissementer ginn am Kader vun de Kommodo-Geneemegungen ënner anerem duerch obligatoresch Kontrollen an Abname vun de Sécherheetsinstallatiounen iwwerwaacht, déi vun engem Organisme de contrôle agréé duerchgefouert ginn an ënner der Autoritéit vun der ITM intervenéieren. D'Etablissementer ginn eng éischt Kéier kontrolléiert, éier se an Exploitatioun ginn, an ënnerleien dono periodesche Kontrollen, woubäi fir d'Sécherheetsinstallatiounen eng Kontrollperiodizitéit vu 12 Méint gëllt.

D'Kommodo-Geneemegung definéiert dobäi och, wéi d'Rapporte vun den Organismes de contrôle agréés der ITM mussen matgedeelt ginn an am Etablissement opzebewahre sinn. D'initial Abnam virun der Mise en exploitation muss un d'ITM adresséiert ginn, während d'Rapporte vun periodesche Contrôle net un d'ITM geschéckt ginn, mee vum Exploitant am Régistre de sécurité mussen opbewahrt ginn a bei Bedarf virgewise ginn.

Zousätzlech zu dësen systemateschen a regelméissegem Kontrolle kann d'ITM zu all Moment punktuell Iwwerprüiwungen maachen, ouni festgeluechte Periodizitéit, notamment op Basis vun enger Reklamatioun, op Initiativ vun der ITM, op Hiweis vun anere Verwaltungen, wann Zweifel un der Sécherheet bestinn oder op Demande vum Exploitant selwer.

Fro N°4: Sinn no dësem Ongléck Iwwerprüiwungen oder Verschäerfungen vun de gëltege Sécherheetsreegele fir dës Etablissementer zu Lëtzebuerg virgesinn?

Opgrount vun den Ursachen, déi an de Medie genannt goufen, goufen d'Sécherheetsreegelen, déi an de Kommodo-Geneemegungen vum Aarbechtsminister festgehale sinn, analyséiert. Dës Analys huet erginn, datt dës Reegelen, wann se konsequent agehale ginn, ausräichend sinn, an datt dofir aktuell keng spezifesch Verschäerfungen vun de gëltege Sécherheetsreegele fir Etablissementer, déi an de Kompetenzberäich vum Aarbechtsminister falen, zu Lëtzebuerg virgesi sinn.

Luxembourg, le 3 février 2026

(s.) Marc SPAUTZ
Ministre du Travail